

RESOLUCIÓN da Xefatura Territorial da Consellería do Mar na Coruña pola que se adoptan medidas de adaptación no Plan de xestión de moluscos bivalvos, a pé e embarcación, en zonas de autorización aprobado á Confraría de Pescadores de Noia para o período 2021-2023

Antecedentes

1. O plan de xestión de moluscos bivalvos a pé e embarcación en autorización da confraría de pescadores de Noia (PE403A 2020/25-1) aprobouse para 2021-2023 mediante a Orde de 21 de decembro de 2020 pola que se aproba o Plan xeral de explotación marisqueira para o trienio 2021-2023 (DOG Núm. 262 de 31 de decembro de 2020).

2. O 17.02.2023 (Núm. entrada 2023/569596) a confraría de pescadores de Noia presentou un escrito solicitando adaptar o plan de xestión modificando o "calendario anual previsto de extracción" e pechar os bancos marisqueiros nos meses de febreiro, marzo e abril de 2023, establecendo unha veda neste período, debido ás circunstancias extraordinarias de forza maior de abondosas choivas rexistradas no outono-inverno coa conseguinte elevación dos caudais dos ríos, que sumado ao efecto dos desenbalsamentos das presas e encoros augas arriba, levaron a que se produxeran importantes baixadas da salinidade na zona estuárica do fondo da ría. Como resultado, prodúxose perda da produción e que os bancos marisqueiros presentan unhas densidades de bivalvos de talla comercial moi baixas que non fan rendible a súa extracción. O peche dos bancos, segundo indican, tamén é necesario para preservar o stock reprodutor e a cría, e favorecer a recuperación do banco para a próxima campaña.

Acompañando a solicitude achegan "Informe de mortalidade por baixa salinidade Plan de bivalvos infaunais en zona de autorización da Confraría de Pescadores de Noia Febreiro 2023" da Asistencia Técnica da confraría e certificación de 17.02.2023 do Secretario dos órganos de goberno da Confraría de Pescadores S. Bartolomé de Noia acreditativa do acordo unánime adoptado pola Xunta Xeral de non reanudar a campaña marisqueira o 20 de febreiro (con previsión de traballo ata o mes de abril), debido á alta mortandade de moluscos nos bancos marisqueiros.

3. O 24.02.2023 a Bióloga de zona da Xefatura Comarcal de Ribeira emite informe sobre a medida de adaptación solicitada pola confraría.



Consideracións legais e técnicas

1. O artigo 21.2 do Decreto 153/2019, do 21 de novembro, polo que se regula o réxime de conservación e explotación dos recursos marisqueiros e das algas, establece que as xefaturas territoriais poderán adaptar medidas, logo de solicitude das entidades titulares dos plans de xestión, ante circunstancias que dificulten ou potencien o seu desenvolvemento, e tendo en conta aspectos biolóxicos, socioeconómicos e de creación de emprego. O artigo 21.3 indica, entre as medidas de adaptación que se poderán incluír, outras vinculadas coa actividade marisqueira.

2. O plan de xestión aprobado á confraría para o período 2021-2023 establece no calendario anual previsto de extracción para ambas modalidades, a pé e dende embarcación, un número probable de días de extracción de 123 e como época probable de extracción de xaneiro a abril e de setembro a decembro.

3. O artigo 7.3 da Orde de 21 de decembro de 2020 pola que se aproba o Plan xeral de explotación marisqueira para o trienio 2021-2023, establece que as xefaturas territoriais poderán adaptar as medidas do plan de xestión, logo de petición do sector, ante circunstancias que dificulten ou ben permitan potenciar o desenvolvemento do plan de xestión, e tendo en conta aspectos biolóxicos, socioeconómicos e de creación de emprego, cando exista:

- a) Solicitude motivada da entidade titular do plan de xestión avalada por informe do seu técnico.
- b) Informe favorable emitido polo persoal técnico da consellería.

4. O informe do persoal técnico da consellería, á vista do informe emitido pola asistencia técnica da confraría, os datos aportados polas mostraxes e o seguimento da produción, conclúe que o descenso da salinidade coma consecuencia das fortes choivas provocou importantes mortalidades de moluscos bivalvos e a baixa densidade de individuos de talla comercial, tanto de berberecho coma de ameixa xaponesa, presente nos bancos conduce a un peche da explotación por forza maior os meses de febreiro, marzo e abril. Ademais, engade que as mostraxes que se levarán a cabo no mes de agosto de 2023 indicarán se os bancos están en condicións de ser explotados no próximo outono.

5. Tendo en conta o anterior, constátase que se trata de circunstancias extraordinarias e inevitables que provocaron unha situación de forza maior que impide que as embarcacións e as persoas mariscadoras poidan desempeñar con normalidade a actividade extractiva.

Esta Xefatura Territorial é o órgano competente para resolver segundo o artigo 21 do Decreto 153/2019 de 21 de novembro, e de acordo con todo o anterior,

RESOLVO:

1. Adaptar o plan de xestión de marisqueo a pé e embarcación en zonas de autorización da confraría de pescadores de Noia e pechar os bancos marisqueiros incluídos no plan de xestión dende o 1 de marzo ata o 30 de abril de 2023 (ámbolos dous incluídos), establecendo unha veda nese período, debido ás circunstancias extraordinarias de forza maior.

Xefatura Territorial da Coruña
Rúa Ramón y Cajal, 2 5º andar (Casa do Mar)
15006 A Coruña
Tel.: 981 182 000
xfaturaterritorial.mar.coruna@xunta.gal





2. Nas consideracións da ficha de aprobación do plan, eliminar o apartado "Días probables de actividade extractiva" e no seu lugar incluír un apartado do seguinte xeito:

"Época probable e número probable de días de extracción: De xaneiro a abril e de setembro a decembro. Os días de actividade extractiva restrínxense a 4 días/semana de luns a xoves, agás o mes de decembro, a primeira semana de xaneiro e en circunstancias especiais como riadas ou peches por biotoxinas, que traballarán todos os días, de luns a venres.

De acordo coa recomendación técnica, debido ás circunstancias extraordinarias de forza maior de finais do 2022 e principios de 2023, que impiden que as embarcacións e persoas mariscadoras participantes no plan poidan desempeñar con normalidade a actividade extractiva, péchanse os bancos marisqueiros incluídos no plan de xestión dende o 1 de marzo ata o 30 de abril de 2023 (ámbolos dous incluídos), establecendo unha veda nese período."

3. Manter para o inicio da próxima campaña a época probable de extracción de setembro a decembro para as dúas modalidades, a pé e dende embarcación, sempre que a información derivada das mostraxes de agosto/setembro realizadas previo ao inicio da campaña amose unha recuperación da estrutura poboacional das especies obxectivo do plan de xestión que permita o normal desenvolvemento da actividade extractiva.

Así mesmo, poderanse realizar accións de conservación, mantemento, recuperación ou mellora dos hábitats e zonas de produción, tal e como estaban programadas para o 2023 no plan presentado.

De conformidade co disposto nos artigos 121 e 122 da Lei 39/2015, do 1 de outubro, do Procedemento Administrativo Común das Administracións Públicas (BOE Núm. 236, do 2 de outubro de 2015), contra esta resolución, que non esgota a vía administrativa, poderán interpoñer un recurso de alzada ante a conselleira do Mar no prazo de un mes a contar dende o día seguinte ó da notificación da presente resolución.

Esta resolución notifícaselle á confraría de pescadores de Noia consonte ao artigo 40 e seguintes da Lei 39/2015, de 1 de outubro.

A xefa territorial
María José Cancelo Baquero
(sinatura electrónica)

Xefatura Territorial da Coruña
Rúa Ramón y Cajal, 2 5º andar (Casa do Mar)
15006 A Coruña
Tel.: 981 182 000
xefaturaterritorial.mar.coruna@xunta.gal

